

Saksprotokoll i fylkesutvalet - 20.02.2014

FYLKESUTVALET 19.02.2014

Fylkesrådmannen orienterte fylkesutvalet om politiaksjonen 17. februar 2014 mot elevar i vidaregåande skular som del i ei større narkotikasak.

Synfaring på Sotra

19. februar 2014 var Hordaland fylkesutval på synfaring på Sotra. Fylkesutvalet møtte mellom anna desse:

Beate Mæsel frå Statens Vegvesen orienterte om aktuelle samferdselsutfordringar.

CCB:

Adm. dir. Knut R. Andreassen orienterte. Omvising ved kommunikasjonsrådgjevar Irene Lillehammer.

Sotra vidaregåande skule:

Omvising og orientering v/ rektor Per Morken og assisterande rektor Erik Strøm.

Møte med kommunane i Sund, Fjell og Øygarden:

Frå kommunane deltok ordførar Eli Årdal Berland, Fjell kommune, ordførar Otto Harkestad, Øygarden kommune og fung. ordførar Nils Kåre Skoge, Sund kommune.

FYLKESUTVALET 20.02.2014

Utdelt i møtet:

- Ny versjon av Kollektivmeldinga 2013.
- Vedlegg til sak 54/14.

I samband med sak 34/14 "Næringsretta midlar til regional utvikling (...)" bad fylkesutvalet om ytterlegare presisering av formålet.

Innsende spørsmål

Aud Karin Oen hadde sendt inn slikt spørsmål:

"Praktisering av formannskapsmodellen

Pressa presenterte nyleg dei gode tala for auka kollektivtrafikk i Bergen. I samferdselsutvalet sitt førre møte spurde Venstre sin representant om kvifor ikkje sakspapira var kjend for dei folkevalde når pressa var kjend med tala.

Spørsmål til fylkesordføraren.

1. Er det rett at dei gode tala frå Skyss vart leverte til nokre politikarar og pressa før alle folkevalde fekk tilgang til administrasjonen sitt saksframlegg?
2. Meiner fylkesordføraren at det er i tråd med formannskapsmodellen at utvalde politikarar og/eller presse får tilgang til saksutgreiing før alle folkevalde er varsla?"

Fylkesordføraren svarte at det var sendt ut pressemelding, som var også publisert på hordaland.no.

Pressemeldinga vart samstundes rutinemessig sendt til utvalsleiarane. Gruppeleiarane er no også inkludert i e-postlista. Som ei prøveordning vil alle folkevalde heretter få kopi av relevante pressemeldingar.

Aud Karin Oen hadde sendt inn slikt spørsmål:

"I strid med SVs budsjettalternativ la fylkesrådmannen opp til ein kraftig takstauke for kollektivtransporten - særlig for einskildbilettar. Blant dei som vert hardest råka er ungdom i distrikta som ikkje reiser dagleg, samt studentar som reiser heim i helgene. Også eldre som ikkje klarar å bruka billettmaskinane eller manglar billettautomat på eige stopp får no ein kraftig utgiftsauke.

Spørsmål til fylkesordføraren:

1. Vil det verte teke initiativ til at studentrabatten på enkeltreiser over 7 soner eller meir blir gjeninnført og til å stoppe prisauken på enkeltbilettar til automattilbodet er betre bygt ut.
2. Vil ein leggje til grunn same teori om prisbasert åtferdsterapi for forureinande biltrafikk gjennom bompengeringen som ein legg til grunn for kollektivtrafikken?"

Mona Hellesnes hadde sendt inn slikt spørsmål:

"Takstregulativ for Skyss og studentrabatt på enkeltbilettar

I samband med at budsjettet for 2014 vart vedtatt i fylkestinget i desember 2013, vart og endringar i Skyss sitt takstregulativ vedtatt. I desse endringane vart studentrabatten for enkeltbilettar, som gjeld 7 takstsoner eller meir, fjerna.

1. Kan fylkesordførar sørge for at endringa som nemnd over vert handsama på nytt politisk?
2. Kan fylkesordførar sørge for at vesentlege endringar i taksregulativet for Skyss vert handsama som einskildsak i førekant av budsjettet?"

Fylkesordføraren svarte samla på spørsmåla om studentrabatt frå Oen og Hellesnes. Han tok utgangspunkt i Hellesnes sine spørsmål:

- Til spørsmål 1 stadfesta fylkesordføraren at endringar i takstregulativet kan verte behandla på nytt dersom nokon ber om det.
- Til spørsmål 2 svarte han at det vil kome ei prinsipp sak før budsjettbehandlinga.

Mona Hellesnes bad om at det vert lagt fram sak om problemstillinga til neste møte i fylkesutvalet.

Fylkesordføraren stadfesta at det vil kome ny sak. Den bør behandlast i samferdselsutvalet før den kjem opp i fylkesutvalet.

OPEN TIME

Mona Røsvik Strømme stilte spørsmål om kvifor sanntidssystemet er sett i drift på haldeplassar med relativt få reisande i Sandviken og ikkje på haldeplassar med mange reisande i sentrum. Direktør Oddmund Sylta i Skyss svarte at systemet vart sett i drift i Sandviken som ein test. Systemet er i ferd med å verte installert på linje 2. Fram mot sommaren vil haldeplassar i sentrum få sanntidssystem.

Benthe Bondhus spurde om partia framleis må kvittere ut for partistøtte, eller om den kjem "automatisk". Fylkesrådmannen vil sjekke dette.

Benthe Bondhus etterspurde status for prosjekt Fureberg bru på Fv 551. Spørsmålet vert svart på i neste møte.

Inge Kallevåg viste til spørsmål i førre møte i fylkesutvalet om fulle skulebussar på Stord, og roste Skyss som raskt ordna opp i forholda.

Inge Kallevåg viste til avisoppslag om manglande korrespondanse i busstilbodet i Sunnhordland. Han spurde om kvifor dette skjer, og om det er noko som kan gjerast. Direktøren i Skyss svarte at det var innført nye snøggbåtruter ved årsskiftet, og at Skyss prioriterer å støtte båtavgangar og hovudruter til Stord. Skyss skal setje i gang arbeid for å vurdere rutestrukturen (buss, båt, ferje) i Sunnhordland. **Benthe Bondhus** bad om at også korrespondansen mellom snøggbåt og buss i Rosendal vert omfatta av dette arbeidet.

Aud Karin Oen etterspurde svar på dei to oversendingsforslaga frå desembertinget i RS 22/14 "Status spørsmål og oversendingsforslag". Fylkesordføraren svarte at evt. svar på oversendingsforslag og spørsmål stila til fylkesadministrasjonen vert gjeve som melding til fylkestinget eller det utvalet dei er lagt fram i.

Silje Hjemdal viste til at trolleybussane på linje 2 har reklame for Litteraturhuset og spurde om korleis reglane er og om kven som får inntektene for reklamen. Direktøren i Skyss svarte at trolleybussane er omfatta av ein gamal avtale som går ut i 2015. Avtalen inneber at operatøren Tide har høve til å hengje opp reklame. Inntektene går til operatøren.